

**Lazarino de Manosco**

# **Li Remembranço**



**C.I.E.L. d'Oc**

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

# N'EN FAU PAS TANT PÈR ÈSTRE UROUS

Leitour, ço que vau vous dire, acò 's l'escrèto verita. Counèisse dous bràvei vièi que, quouro se maridèron, èron paure coumo d'aïet. Mai èron riche en jouïnesso emai en filousoufio, aquelo boueno filousoufio que n'i'a pas gaire encuei que sachon ço qu'es. Mioun emé Martin se calignavon desempuèi l'iàgi de quinge an. Trimavon au travai touto la semana, mai garo quouro venié lou dimenche! Lei vaqui parti en brasseto. Anavon sus la plano, moute lou vièi ounce Maien jugavo dóu tambourin, e danso que tu dansaras! Sei cambo disien jamai sebo!... Martin, enterin que dansavon, raubavo quàuquei poutoun sus lei gauto cremesino de sa Mioun; mai acò èro fa tant subitò que degun se n'avisavo. Acò durè cinq an. Mai quand Martin aguè tira lou pu gros numerò de sa classo, diguè à Mioun:

- Sabes, ma bello, acò pòu pas dura 'nsin; fau que nous mariden. Siéu pas countènt de te vèire que lou dimenche, te vouele pèr ma mouié, enfin que pouesque te poutouna, te moussela e te rèndre urouso que-noun-sai! Sian paure, es vrai, mai ai de bouen bras, travaïarai tant que pourrai, e sabes que lou travai alasso pas, quand lou couer es countènt! N'en fau tant gaire pèr èstre urous! Veiras, te proumete qu'auras pas de que t'en repenti.

Mioun que, de soun caire, demandavo pas mai, diguè pas noun, e lou lendeman, Martin la vai demanda 'n mariàgi. Si boutè lou capèu dóu dimenche, uno blodo bluro, estirado de fres, de braïo de velout tóutei novo, e lou vaqui parti... Lou couer li batié bèn fouert: avié 'no pòu dóu diable que lou mandèsson fa lanlèro! E se troumpavo gaire. Siguè respoundu à sa demando qu'èron trop paure pèr si marida, que rèn emé rèn fai leis enfant giela, que li èron à tèms de se metre dins la misèri. Mai, coume acò fasié pas lou comte de nouésti calignaire, Mioun se bouto à ploura, e davans lei lagremo de la bello fiheto, lou paire emé la maire diguèron:

— Maridas-vous! farés coumo nautre. Quand manjarés pas de poulet, manjarés de cebo. Basto sigués pas malaut. Un chin en brandant sa coue gagno sa vido; vautreï que sias jouine e qu'amas lou travai, la gagnarés peréu... A la gàrdi de Diéu!

Un mes après s'i maridavon. Es eici que tóutei lei chicho-acuèrni e leis envejous d'encuei aurien fa 'no bello bèbo!

Quand vous ai di en coumençant que nouéstei calignaire èron paure coumo d'aïet, mi troumpave pas: lou lendeman de sei noueço, si revihèron dins uno pichoto chambro que li servié de cousino, de saloun, de tout ço que voudrés. Lei mobile èron semena rar.